

ԱՐԱՆԳ ԱՆՈՒՄ

XIX ԴԱՐԻ ՀԱՅ ԱԶԱՏԱԳՐԱԿԱՆ ՇԱՐԺՈՒՄՆԵՐԸ
ԵՎ ԻՆԴՈՆԵԶԻԱՅԻ ՀԱՅ ԳԱՂՈՒԹԸ

Սույն հոդվածի նպատակն է պարզաբանել այն կապը, որ եղել է հեռավոր ինդոնեզիայի հայ գաղութի և 19-րդ դարի հայ ազատագրական շարժումների միջև:

Աշխարհով մեկ տարածված տարագիր հայության բնկորներից մեկն է ինդոնեզիայի հայ գաղութը, որը հանդիսանում է Նոր-Ջուլայի գաղթականության մեկ ճյուղավորումը:

Ինդոնեզիայի հայերը գաղթել են այստեղ Նոր-Ջուլայից և Հնդկաստանի զանազան քաղաքներից: Դաղթի գլխավոր պատճառը եղել են պարսիկ բռնակալների հալածանքների հետևանքով առևտրի ասպարեզում Նոր-Ջուլայի հայ վաճառականների կրած կորուստները¹: Նոր-Ջուլայի վաճառականները իրենց կորցրած տնտեսական դիրքերը վերականգնելու համար մեկնում էին Հնդկաստանի և ինդոնեզիայի քաղաքները, ուր գտնվող հումքի հարուստ աղբյուրները վաղուց էին հրապուրել եվրոպական գաղութարարներին:

Ինչպես հայտնի է, ինդոնեզիան 1602 թվականից գտնվում էր հոլանդական տիրապետության տակ: Հոլանդական Արևելա-Հնդկական ընկերության 1656 թ. թղթածրարներից մեկում կատեղեկություն այն մասին, որ Մակասար քաղաքում (Չելեբես կղզի, այժմ Սուլավեսի) հաստատված է եղել խոշա Սուլիման անունով մի հայ վաճառական: Սա ամենահին տվյալն է ինդոնեզիայում գտնվող հայերի վերաբերյալ:

Ինդոնեզիայի հայ գաղութը հիմնականում կազմավորվել է հաջորդ՝ 18-րդ դարի առաջին կեսին: Դրա ապացույցն է հանդիսանում այն փաստը, որ Հոլանդական Արևելա-Հնդկական ընկերությունը 1747 թ. մարտի 31-ին մի հրովարտակով ինդոնեզիայի հայերին տալիս է ազատ քաղաքացու իրավունք: Դա վկայում է, որ այդ ժամանակ ինդոնեզիայում գտնվում էր ստվարաթիվ հայություն², Բայց գաղութի բնակչությունը հատկապես ավելանում է 18-րդ դարի վերջերին, երբ Հնդկաստանից ինդոնեզիա են գալիս բավական թվով նոր հայեր՝ Հնդկաստանում տեղի ունեցող մի շարք իրադարձությունների պատճառով:

Այս գաղթվայրում հայերը ժամանակի ընթացքում կարողանում են մեծ դիրքերի հասնել, հավասարվելով առևտրի ասպարեզում եվրոպացիներին: 1780-ական թվականներից սկսած ինդոնեզիայում առևտրական լայն գործունեություն են ծավալել Հովհ. Մանուել Շերիմանյանը, Եղիա Հակոբյանը և Վարդան Գասպարյանը³:

Այս շրջանում բախտի նոր ասպարեզ փնտրելու համար ղեպի ինդոնեզիա ուղևորվող հայերից մեկն էր Գևորգ Մանուկյանը, որ Մադրասի խոշոր վաճառականներից էր: Օժտված լինելով հայրենասիրական ջերմ ոգով, Գևորգ Մանուկյանը նպատակ է ունեցել լոնդոնում հիմնել հայ ազգային համալսարան: Նա նյութական մեծ կարողությունների տեր լինելով, դրամական փոխատվություն է արել հոլանդական կառավարությանը, վայելելով միաժամանակ հոլանդական նահանգապետի վստահությունը:

Գևորգ Մանուկյանի հետ միասին Ջավա են գալիս նաև երկու քույրերը՝ Մարիամ Հարությունյանը և Թագուհի Մանուկյանը, որոնց նախաձեռնությամբ և նյութական օժանդակությամբ կարճ ժամանակամիջոցում գաղութում հիմնադրվում են մի շարք ազգային հաստատություններ⁴:

Նվաճա 19-րդ դարի առաջին կեսում սկիզբ է առնում ինդոնեզիայի հայ գաղութի ազգային-հասարակական եռուն կյանքը, 1831 թ. Բատավիայում (այժմ Ջակարտա) Հակոբ Հարու-

1 Հ. Հորդանանյան, Նետրլանդական Արևելեան Հնդկաստանայ հայ գաղութի պատմություն, սկզբին մինչ մեր օրերը, Երուսաղեմ, 1937, էջ 11—13:

2 Հ. Հորդանանյան, էջ 15—16:

3 Հ. Հորդանանյան, էջ 72:

4 Գ. Գասպարյան, Համառոտ կենսագրություն երկուց բարերարաց Ջուլայու, Նոր-Ջուլա, 1883, էջ 1—7:

թյունյանը հիմնադրում է մի մատուռ՝ Ս. Հովհաննիս անունով⁵, իսկ 1852 թ. Բատավիայում գումարված մի ժողովում որոշվում է ստեղծել մի կազմակերպություն «Հայկյան միաբանություն» անունով՝ Ինդոնեզիայի չքավորներին և որբերին օգնելու համար: Այդ կազմակերպության օգտին ձեռնարկված հանգանակությանը մասնակցում են Մարիամ Հարությունյան և թագուհի Մանուկյան քույրերը՝ մի պատկառելի գումարով: Այնուհետև՝ 1854 թ. երկու քույրերի ակտիվ աջակցությամբ կառուցվում է Բատավիայի Ս. Հովհաննես եկեղեցին: Մատաղ սերունդին մայրենի լեզվով կրթություն տալու համար, 1855 թ. հիմնվում է «Մանուկ և Հարություն» ուսումնարանը՝ երկու քույրերի ջանքերով. ուսումնարանի առաջին տեսուչ է նշանակվում հմուտ դրարարագետ Խաչիկ Թովմասյանը: Ուշագրավ է այն փաստը, որ սույն դպրոցում սովորում էին նաև եվրոպացիների զավակներ: Այնուհետև, մեկ տարի անց, ուսումնարանին կից ստեղծվում է մատենադարան, ուր պահպանվել են հայերեն, անգլերեն և հոլանդերեն թերթեր, հանդեսներ և գրքեր⁶: Ինդոնեզիայի հայերը մեծ մասամբ զաղթած լինելով ուղղակի նոր-Ջուդայից, սերտորեն կապված էին իրենց վաղեմի հայրենիքի հետ, որի հանդեպ նրանք հոգու խորքում պահպանել էին կարոտի և սիրո ջերմ զգացմունքներ: Նրանք ամեն կերպ աշխատում էին օժանդակություն ցույց տալ նոր-Ջուդայի իրենց հայրենակիցներին: 1858 թ. նոր-Ջուդայի չքավորներին օգնելու համար նրանք հիմնադրում են «Գանձանակ Ջուդայու տնակաց»-ը: Այնուհետև՝ 1864 թ. Բատավիայում կայացած մի ժողովում որոշվում է ստեղծել մի ուրիշ գանձանակ, ազգային գրավոր աշխատությունների տպագրության գործին օժանդակելու համար⁷:

Ինդոնեզիայի հայ գաղութի ազգային-հասարակական կյանքում խոշոր դեր են կատարել Մանուկ Հորդանանյանը, Բարսեղ, Պողոս և Կարապետ Անդրեասյանները, Եղիազար Գասպարյանը, Մինաս Հովակիմյանը, Աղանուր Աղանուրյանը, Գևորգ Զաքարյանը և շատ ուրիշներ: Սրանք բոլորն էլ վաճառականներ էին, որոնք միաժամանակ առատաձեռն մասնակցություն էին բերում այս կամ այն ազգային ձեռնարկման համար գաղութում կազմակերպված հանգանակություններին⁸:

Գաղութի բարդավաճմանը զուգընթաց, աստիճանաբար նորանոր գաղթականական համագծեր են անցնում ղեկի Ինդոնեզիա, որոնք հաստատվում են ղանազան քաղաքներում և սկսում են ծավալել առևտրական եռուն գործունեություն:

Արդեն 19-րդ դարի կեսերից սկսած ազդեցիկ հայ վաճառականներ կային՝ Սեմարանգում (ուր հայերը բնակություն էին հաստատել նույն դարի սկզբից), Սուրաբայայում, Զապարայում, Ջերիրոնում, Թեդալում, Բանդունգում, Սուրակարտայում, Մակասարում և այլ նշանավոր քաղաքներում⁹:

Ինդոնեզահայ վաճառականներից շատերն իրենց գործունեությունն այնքան էին զարգացրել և ընդլայնել, որ առևտրական կապերի մեջ էին նաև Ավստրալիայի, Սինգապուրի, Հնդկաստանի, Ճապոնիայի, Պարսկաստանի, Եվրոպայի և այլ շուկաների հետ¹⁰: Ինդոնեզիայի առևտրի զարգացման գործում մեծ է եղել տարբեր ժամանակներում հիմնադրված բազմաթիվ հայ առևտրական տների և ընկերությունների դերը:

Ինդոնեզիայի հայերից ոմանք, հանդիսանալով զարգացած և լեզուներ իմացող անձնավորություններ, պատասխանատու վարչական պաշտոններ են վարել տեղական կառավարության մեջ, վայելելով հոլանդական պետության վստահությունը: Այսպես, օրինակ, 19-րդ դարի առաջին կեսում Հովսեփ և Հովհաննես Պետրոսյան և զրաբյանները և էմիլ Մատուրը Զավայում նահանգապետի օգնական են եղել: Իսկ 1863 թ. Ա. Պ. Աղանուրը Զավայի նահանգապետի հրամանով նշանակվում է պետական թարգմանի:

Սակայն՝ շնայած առևտրական և հասարակական կյանքում կարճ ժամանակվա ընթացքում ունեցած հաջողություններին, Ինդոնեզիայի հայ գաղութի բարդավաճման շրջանը երկար չի տևում: 1870-ական թթ. դաղութը սկսում է ապրել տնտեսական անկում, վրա է հասնում կալվածական հասույթների և առևտրական տների եկամուտների նվազում, որի պատճառը կառավար-

5 «Բազմավեպ», Վենետիկ, 1899, էջ 464:

6 «Երկր», Թիֆլիս, 1904, էջ 189:

7 Բ. Գուշակյան, Հնդկաստան, Երուսաղեմ, 1941, էջ 274—277:

8 Հ. Հորդանանյան, էջ 22:

9 Թ. Գուշակյան, էջ 276:

10 Հ. Հորդանանյան, էջ 23—24:

11 «Բազմավեպ», 1899, էջ 465:

12 Հ. Հորդանանյան, էջ 26—29:

բության կողմից հովանավորվող հոլանդական առևտրական տների և ընկերությունների հոգ-
րացումն էր: Այսպիսի պայմաններում Ինդոնեզիայի հայ գաղութը այլևս անկարող էր դիմանա-
լու մրցակցություն: Իրա հետևանքով գաղութի մեծահարուստ վաճառականներից շատ շատերն
ստիպված էին հեռանալ Ինդոնեզիայից: Մի խոսքով գաղութի տնտեսական կարողությունը զգա-
լիորեն նվազում է, որի հետևանքով 1872 թ. փակվում է «Մանուկ և Հարություն» ուսումնա-
լանը (այն հետադադարում կրկին վերաբացվում է Մուրաբայայում)¹³: Սակայն վայրէջքի այս
շրջանը երկար չի տևում, հետագա տարիներին գաղութը կարողանում է մասամբ վերականգնել
իր նախկին դիրքերը, իսկ ազգային կյանքը համառորեն շարունակում է պահպանել իր գոյու-
թյունը:

1880 թ. հունվարի 6-ին նահանգապետի հրովարտակով վավերացվում է հայոց ազգային
սահմանադրությունը շարադրված հոլանդերեն լեզվով, որն այնուհետև թարգմանվում է գրա-
բարի և անգլերեն լեզվով: Այս օրենքը, որ կոչվում է «Սահմանադրություն և կարգադրություն
Հայոց ի Զավա», բաղկացած է 27 կետերից: Ըստ սահմանադրության՝ տարին մեկ անգամ Բա-
տավիայում պետք է դրամավեր ընդհանուր ժողով, ուր քվեարկությանը կարող էին մասնակցել
այն տղամարդիկ, որոնք առնվազն 21 տարեկան էին և 2 տարուց ոչ պակաս ապրել էին Զա-
վայում: Այս ժողովում պետք է ընտրվեր բատավարնակ հինգ անձնավորություն: Երկրից կազմված
մի վարչություն, որը կոչվում է «Հանրական ատեան յանձնաձևաց ժողովրդեան հայոց ի Զա-
վա»: Սահմանադրության մեջ կային հատուկ կետեր եկեղեցու, «Մանուկ և Հարություն» ուսում-
նարանի և «Հայկյան միարուսթյան» անունով եղած ազգապատկան կալվածների վերա-
բերյալ, ուր խոսվում էր դրանց մատակարարման պայմանների մասին: Վերջին կետը վերա-
բերում էր այն մասին, թե Զավայի հայության վերջանալու դեպքում գաղութի ազգապատկան
սեփականությունները պետք է անցնեն էջմիածնի կաթողիկոսի տրամադրության տակ և հետա-
դադարում հատկացվին հայ ժողովրդի լուսավորության գործին¹⁴:

Ինչպես արդեն ասացինք, Ինդոնեզիայի հայ գաղութի ծագումը առնվազն 17-րդ դարից է:
Բայց միայն 19-րդ դարի առաջին կեսին է, որ նա կազմակերպվում է որպես ազգային հավա-
քականություն, դրա հետ ստեղծելով ազգային-մշակութային կյանք: Նվրոպայի, Դալիայի և հատ-
կապես Հնդկաստանի հայ գաղութներում ծավալվող մտավորական շարժումը մեծ ոգևորու-
թյուն էր ստեղծում հեռավոր Ինդոնեզիայում, ուր ապրող սակավաթիվ մտավորականներն առնե-
լանք զործադրում էին գաղութի մտավոր մակարդակը բարձրացնելու համար: Ինդոնեզիայի հայ
մտավորականության ներկայացուցիչներից էին՝ Գ. Զաքարյանը, Ն. Թովմասյանը, Ա. Աղանու-
րը, Գ. Տեր-Գասպարյանը և ուրիշներ, որոնց ղրղին հն պատկանում մի շարք արժեքավոր ուսում-
նասիրություններ: Նրանցից շատերը արձագանքել են նաև ժամանակակից մամուլում տեղ գտած՝
հայ մշակութային փրարիայի այս կամ այն հարցի ուսումնասիրումը նվիրված բանավեճերին: Մեծ
հետաքրքրություն հն ներկայացնում նաև ինդոնեզահայ բանաստեղծների ստեղծագործություն-
ները: Գաղութի անդամներից առաջավոր մարդիկ մտածում էին իրենց տնտեսական կարողություն-
ներից բաժին հանել համահայկական լուսավորության գործի համար, աշխատում էին օժանդա-
կել աշխարհի զանազան վայրերում գտնվող հայկական մշակութային ձեռնարկումներին՝ զրու-
րոցներին, տպարաններին, մամուլին և միաժամանակ բազմաթիվ գրքերի տպագրության մեկնե-
նաս էին հանդիսանում:

Ինդոնեզիայի հայ գաղութի անդամները չէին բավականանում միայն առևտրական գոր-
ծունեությամբ և շահույթ հետապնդելով. նրանք միաժամանակ ազդեցիկ ուժ էին հանդիսանում
նաև համազգային կյանքում և բոլոր առիթներով արձագանքում էին նրա պահանջներին: Ինչ-
պես Նոր-Զուդայի և Հնդկաստանի հայերը, այնպես էլ ինդոնեզահայերն իրենց մեջ պահպանել
էին ղեպի հայրենի բնաշխարհը վերադառնալու ցանկությունը: Դեպի հայրենիք վերադառնալու
ներառյ ձգտումն աստիճանաբար ավելի էր ուժեղանում այն պատճառով, որ Ինդոնեզիայի հայ
վաճառականներն այլևս չէին կարողանում դիմանալ հոլանդական մրցակցու-
թյանը: Նվրոպա-
կան կապիտալը հետզհետե մեկուսացնում էր նրանց՝ զուրս մղելով առևտրական շուկաներից:
Նման հանդամանքները ստիպում էին մտածել ինդոնեզահայերին՝ նպաստելու օտար լծի տակ
տառապող հայրենիքի փրկության գործին, երազելով տեսնել իրենց հայրենիքը ազատագրված
և անկախ: Հնդկահայերի նման ինդոնեզահայերը ևս Հայաստանի ազատագրության բախտը
կապում էին Ռուսաստանի հետ, ուստի հերոսական ժողովրդին համարելով Հայաստանի միակ
ազատարարը:

13 Թ. Գ ու շ ա կ յ ա ն, էջ 277—278

14 Հ. Հ ո ղ ո ղ ա ն ա ն յ ա ն, էջ 46—52:

1828 թ. ռուս-պարսկական պատերազմի հետևանքով, ռուս ժողովրդի օժանդակությամբ հայրենիքի իրագործված ազատագրությունը, պարսկական լծից, արտակարգ ուրախություն է պատճառում Զավա կղզու Սեմարանգ քաղաքում բնակություն հաստատած նշանավոր վաճառական Հովսեփ Ամիրխանյանին: Ղարաբաղի այս վաճառականը, որ անսահման հարստություն էր դիզել Զավայում, Հայաստանի ազատագրության լուրը լսելիս, ցանկանում է վերադառնալ իր հայրենիքը: Այս կապակցությամբ Ամիրխանյանը 1829 թ. հոկտեմբերի 20-ին ներսևս Աշտարակեցուն ուղղած իր նամակում գրում է. «Այժմ մենք ավելի երջանիկ ենք մեր նախնիքներից, վասնզի արժանացանք տեսնել ամենասիրելի հայրենեաց ազատությունը: Եւ ուրեմն՝ սրբազան պարտաւորութիւն ենք համարում արտայայտել մշտական երախտապարտութեան մեր խորին զգացմունքը Ռուսիոյ կայսեր, մեր հին հայրենեաց մեծահոգի ազատիչին... որ առաջին թագաւորը եղաւ՝ Արարատեան աշխարհում ազգիս խաղաղութիւն և ազատութիւն պարգևող: Այնուհետև ազնաւորեալ է, որ 1830 թ. մտադիր է իր սեփական նավերով ուղևորվել Հոլանդիա, ուր կարևոր գործեր ունի հոլանդական թագավորի հետ, որից հետո կայցելի Ռուսաստան՝ կայսրի հետ հանդիպում ունենալու համար: Միաժամանակ միամտաբար խնդրում է ներսևս Աշտարակեցուն՝ տեղեկություններ ուղարկել իրեն, թե՞ Ռուսաստանը ի՞նչ մտադրություն ունի Հայաստանը ղեկավարելու վերաբերյալ. «արդեօք ի՞նչը տիրապետելով պիտի կառավարէ Հայաստանը, թէ՞ պիտի դարձնէ սորան իւր տէրութեան մի առանձին անկախ մասն»: Ի վերջո նշում է, որ եթե հնարավոր լինի, մտադիր է գնելու Ղարաբաղը Փայտակարանի հետ միասին. «կամ թէ մի որոշ հարկ տալ» նրանց տիրելու համար: Նա հիշատակելով իր անսպառ հարստությունների մասին, գրում է. «Բայց բազդի այդ բոլոր ձոխ պարգևները տակաւին ինձ չեն մխիթարում, երբ մտաբերում եմ թէ ինչ վիճակի մէջ է իմ սիրելի հայրենիքը»: Նամակի վերջում ցանկություն է հայտնում իր ընտանիքով և զուգարներով գալ Հայաստան և նրա ծաղկման ու բարգաւաճման համար մի այնպիսի զուգար հատկացնել, որը կարողանա տարեկան 500.000 ռուբլի եկամուտ բերել, թե՛ իր կենդանության ժամանակ և թե՛ մահվանից հետո:

Հովսեփ Ամիրխանյանի նամակը բաժանվելով, ներսևս Աշտարակեցին այն ուղարկում է Պետերբուրգ՝ խաչատուր լազարյանին, որը նամակը ռուսերենի թարգմանելով ներկայացնում է կոմս Բենկենդորֆին: Վերջինս այդ մասին տեղյակ պահելով ռուսաց կայսրին, պատասխանում է, որ ցարը ցանկանում է, որպեսզի Ամիրխանյանը զա իր մոտ, իսկ նրա պահանջած տեղեկությունները ցարն անձամբ կտա Ամիրխանյանին, հանդիպելուց հետո:

Արխիվային մի նորահայտ տեղեկության համաձայն՝ Հովսեփ Ամիրխանյանը ցարին առաջարկել է իրեն հանձնել Արարատյան նահանգը, այնտեղ հայկական իշխանություն հիմնելու համար՝ հանձն առնելով այդ ղեկավարում նրան վճարել տարեկան կես միլիոն ֆրանկ. նիկոլայ ցարը մերժել է այդ առաջարկը, հայտնելով, որ այդ երկրամասը արդեն Ռուսաստան է, իսկ ինքը Հայաստանի արքայ:

Սակայն ցարական Ռուսաստանի մտադրությունները շուտով պարզվում են Հայաստանի նկատմամբ: Հեղեհահայերը, այդ թվում Զավայի նշանավոր վաճառական Հ. Ամիրխանյանը, որոնք մեծ հույսեր էին կապում Ռուսաստանի հետ, խոր հիասթափություն են ապրում: Նրանք հասկանում են, որ Ռուսաստանի օգնությամբ Հայաստանի ազատագրումը պարսկական բռնակալության ծանր լծից՝ չէր ճշանակում, որ հայրենիքը քաղաքական անկախություն էր ստանում: Ցարական Ռուսաստանը Հայաստանին զաղութացնում էր շահագործելու նպատակով: Բայց և այնպես Ռուսաստանի տիրապետության տակ ընկնելը և իր բախտը ռուս մեծ ժողովրդի հետ կապելը զրական երևույթ էր և շատ ավելի ձեռնտու էր հայ ժողովրդի համար, քան պարսկական բռնապետության ահավոր լուծը:

Հայ ժողովրդի ազատագրման զաղափարը ինդոնեզիայի հայ զաղութում արձագանք է գրտնում նաև մի քանի տասնամյակ հետո, Արևմտյան Հայաստանում ազգային շարժումների ժամանակաշրջանում: Եվ պետք է ասել, որ այնուհետև ինդոնեզահայերի ուշադրության առարկան հանդիսանում է հիմնականում Արևմտյան Հայաստանի ազատագրման հարցը:

19-րդ դարի կեսերից սկսած նոր թափով էին սկսել ծավալվել արևմտահայերի ազգային-ազատագրական շարժումները սուլթանական բռնակալության պայմաններում: Այս շրջանում՝

15 Ա. Երիցյան, Ամենայն հայոց կաթողիկոսութիւնը և կովկասի հայք 19-րդ դարում, մասն Բ, Թիֆլիս, 1895, էջ 507—511:

16 Հայկական ՍՍՌ Պետական Մատենադարանի արխիվ, կաթողիկոսական դիվան, թղթապանակ № 17, վավերագիր № 68, էջ 4:

թուրքական կառավարությունը միջոցներ էր ձեռք առնում Զեյթունի և Սասունի կիսանկախությունը վերացնելու համար:

Դեռևս 18-րդ դարից սկսած փորձեր էին արվում նվաճելու կիսանկախ Զեյթունը: 1770-ական թթ. մինչև 1850-ական թթ. վերջերը Զեյթունի դեմ կատարված բազմաթիվ ոտնձգություններից ու արշավանքներից հետո, 1862 թ. մեծ ապստամբությունը իր ուրույն տեղն ունի հերոսական Զեյթունի պատմության մեջ¹⁷:

Զեյթունի այդ կոիվների արձագանքները տարածվեցին ամենուրեք. նրա օրինակին հետևելով ազատագրական շարժումներ բռնկվեցին Արևմտյան Հայաստանի մի շարք վայրերում՝ Վանում, Մուշում, Հրդրումում, Չարսանչակում և Կ. Պոլսում: Զեյթունի հերոսամարտը մեծ արձագանք է գտնում նաև ժամանակի հայկական մամուլում, ուր տպագրվում են այդ իրադարձությունը լուսաբանող բազմաթիվ հոդվածներ: Վերոհիշյալ դեպքերի մեկնաբանմանը և վերլուծմանն անդրադառնում են այնպիսի պարբերականներ, ինչպես Զմյուռնիայի «Սադիկ»-ը և Կ. Պոլսի «Մեղու»-ն: Այդ կապակցությամբ նաև Կարապետ Շահնազարյանը հանդես գալով ֆրանսիայում լույս տեսնող «Փարիզ» կիսամյա լրագրում, գրում է. «Մարաշի հայերն թրքայ սրով կոտորուեցան. թերևս Զեյթունի և այլ հայաբնակ դիւղերու կամ բաղաներու մէջ ալ մեր ողորմելի համադրիներն նոյն ցաւալի օրհասին հանդիպել են կամ պիտի հանդիպին. ով գիտէ՞ թէ սպանուածներու անտէր ընտանիք այսօր ինչ խեղճութեան մէջ են»¹⁸:

Զեյթունի կոտորածի ցավալի լուրը ցնցում է նաև Ինդոնեզիայի հայերին, որոնք մինչ այդ շատ անդամներ էին իրենց ակտիվ մասնակցությունը հանդես բերել զանազան համազգային հայրենասիրական ձեռնարկումներին և ազգային աղետների հետևանքով թշվառացած կարոտյալներին օգնելու հանդանակությանը: Այս առթիվ Բատավիայում հավաքվում է 568 ուսույթ, որը փոխանակագրով հասցվում է Փարիզ՝ թերթի խմբագրությանը, որպեսզի այն, ինչքան հնարավոր է շուտ, ուղարկվի հերոսամարտի տուժածներին: Նախքան այն, թերթի միջոցով այդ նպատակի համար հավաքված գումարը 2085 ֆրանկ էր, որը, միանալով Բատավիայից ուղարկված գումարի հետ, կազմեց 3266 ֆրանկ 44 սանտիմ: Արժանի է հիշատակման, որ Բատավիայի նվիրատուների անունների ցանկում եղել են նաև բազմաթիվ կանայք¹⁹:

Այնուհետև ևս տարբեր շրջաններում, հերոսական Զեյթունում տեղի ունեցած դեպքերը միշտ էլ գտնվել են ջավահայերի ուշադրության կենտրոնում. նրանք ամեն կերպ աշխատել են իրենց օգնությունն ու կարեկցությունը հանդես բերել զեյթունցիների նկատմամբ: Դրա վառ ապացույցն է հանդիսանում նաև նրանց օժանդակությունը զեյթունցիներին՝ 1887 թ. հուլիսի 26-ին Զեյթունում պատահած մեծ հրդեհի առթիվ, որի պատճառով սոսկալի շրջավորության մատնվեց ողջ ժողովուրդը: Այդ առթիվ Մարսելյում հրատարակվող «Արմենիա» թերթում տպագրվում է թերթի խմբագիր Մկրտիչ Փորթուգալյանի կողմ «Օգնենք զեյթունցիներին» վերնագրով, ուր նկարագրվում է, թե բազմաթիվ հայեր Զեյթունում մնացել են անապաստան վիճակում, որը մինչև անգամ հուզել է օտարազգիների սրտերը: Այդ կողմ մեծ ներգործություն է ունենում զանազան վայրերում, այդ թվում նաև Բատավիայի հայերի մեջ, որոնք մի գումար են հանդանակում ի նպաստ իրենց առասպելական սխրագործություններով հայտնի զեյթունցիներին²⁰:

Զեյթունի 1862 թ. ապստամբությունը խթան հանդիսացավ ազգային-ազատագրական զաղափարների ավելի մեծ թափով ծավալմանը Արևմտյան Հայաստանում: 70-ական թթ.-ից մի նոր էտապ է սկսվում հայ ազատագրական շարժումների պատմության մեջ, երբ ավելի են ուժեղանում հայության նկատմամբ եղած հալածանքները և ճնշումները: Սկսում է նոր ուժով արժարժել հայկական հարցը, որը ներկայացվում է քննարկման Բեռլինի հանրահռչակ կոնգրեսին՝ 1878 թ.: Ինչպես հայտնի է՝ այս կոնգրեսում վերանայվեց Սան-Ստեֆանոյի պայմանագիրը, ընդ որում պայմանագրի 16-րդ հոդվածը, որը վերաբերում էր Արևմտյան Հայաստանում բարենորոգումներ անցկացնելուն: Պետք է նշել, որ կոնգրեսում հայկական հարցի նկատմամբ ոչ մի նպաստավոր քայլ չկատարվեց:

Սակայն մայր հայրենիքի ողբալի դրությունը չէր վրիպում ինդոնեզահայ մտավորականության տևական ուշադրությունից: Արդեն հուլանդական տիրապետության շրջանում Ինդոնեզիայի առանձին նահանգներում ծագած բազմաթիվ ապստամբությունները՝ ուղղված հուլանդական գա-

17 Ընդհանուր տեղեկությունների համար տե՛ս Վ. Մ Է Ի Բ Ե Ս Ե Յ Ե Ն, Զեյթունի հերոսամարտերը, Երևան, 1960:

18 «Փարիզ» (թերթ), 1862, № 75:

19 «Փարիզ», 1863, № 84:

20 «Արմենիա» (թերթ), Մարսել, 1887, № 12, 1888, № 71:

ղութատիրության ղեմ, խոր ազդեցություն էին թողնում նաև այդ երկրում հաստատված փոքրաթիվ հայության վրա. ինդոնեզահայերը մտածում էին, որ հայ ժողովուրդը նույնպես իրավունք ունի անկախ և ինքնիշխան լինելու, ինչպես բոլոր ժողովուրդները: Ստրկացած Հայաստանի ծանր վիճակը մեծ մտահոգություն էր պատճառում ինդոնեզահայերին, որոնք սկսում էին հետըհետև ավելի խանդավառվել Հայաստանի ազատագրության զաղափարով և մինչև անգամ ծամանակակից մամուլում հանդես էին գալիս հայրենի երկրի ժողովրդին օգնություն ցույց տալու վերաբերյալ կոչերով ու նամակներով:

Բատավիայից ինդոնեզահայ մտավորականության ներկայացուցիչներից մեկը՝ Դասպարյանը «Արմենիա» թերթի էջերում տպագրած մի նամակով դտնում է, որ հայ ժողովրդի մեջ պետք է տարածել ինքնօրինության զաղափարը և «յեղափոխական շարժմանց հոգին բուն Հայաստանի համազգեաց մէջ», որպեսզի պատեն հաղթող ազատագրական պայքարի դրոշմ բարձրացվի ընդդեմ բռնակալության²¹:

Հետաքրքրություն է ներկայացնում նաև Մակասար քաղաքում ապրող Թ. Ստեփաննոսյանի նամակը, որը նույնպես տպագրված է վերոհիշյալ թերթում: Նամակագիրը գրում է, որ զգայուն սիրտ ունեցող ամեն մի հայ պիտի ոչ միայն արտասուք թափած լինի մեր տարաբախտ հայրենակիցների դառն ու ողբալի վիճակի վրայ, այլև շտապեալ պիտի լինի յամոթոյ, մեր ազգային մեղսականության թմրութեան վրայ: Իր խոսքը ուղղելով ողջ հայությանը, նամակագիրը հարց է տալիս, թե չպե՞տք է արդյոք նրանք օժանդակեն իրենց եղբայրներին նյութական և բարոյական միջոցներով: Համոզված լինելով, որ հայ ժողովուրդը անպայման պաշտպանության տակ կանի իր դժբախտ ազգակիցներին, պատասխանում է. «Ահա հաւատալի է թէ չընեն զայս, կը ստեն հայութեան անունը եթէ այլ ևս անտարբեր մնան: Զկրնայ մէկը այլ ևս ասել, թէ հայրենիքն չունի խօսելոյ, թէ հայն իրեն զգացման ազատ թարգման չունի»: Այնուհետև առաջ է քաշում համազգային ազատագրական պայքարին օգնելու և բռնատիրության լուծը թոթափելու զաղափարը²²:

Ինչպես հայտնի է, Մ. Փորթուգալյանի հրատարակած «Արմենիա» թերթը, ինչպես և նրա հիմնադրած «Հայոց հայրենասիրական միությունը», որի անդամները կոչվեցին «արմենականներ», հայ ժողովրդի ազատագրման ծրագրերի իրականացումը կապում էր արևմտա-և վրդպական պետությունների նվաճողական պլանների հետ²³:

Մարսելում «Հայոց հայրենասիրական միության» հիմնադրման լուրը արձագանք է գրտնում նաև Ինդոնեզիայի հայերի մեջ, որոնց հուզում էր արևմտահայերի վիճակի բարելավման և հայկական հարցի լուծման խնդիրը: «Հայոց հայրենասիրական միությանը» օգնելու համար Բատավիայում՝ Սուրաբայայի և Սեմարանգի հայերի մասնակցությամբ գումարվում է մի ժողով, ուր որոշվում է տարեկան մի նպաստ հատկացնել «Հայոց հայրենասիրական միությանը» և Լոնդոնում լույս տեսնող «L'Arménie» լրագրին: Այդ գումարը պետք է ուղարկվեր երեք ամիսը մեկ անգամ. յուրաքանչյուր եռամսյակի գումարը պետք է փոխվեր 320 ֆրանկ 60 սանտիմ, որը հավաքվելու էր Բատավիայի, Սուրաբայայի և Սեմարանգի հայերի միջոցով: Բացի այդ, Բատավիայի հայ կանայք, Սուրաբայայի և Սեմարանգի կանանց հետ միասին, մի մասնա-ժողով են կազմում և ձեռագործներ են պատրաստում վիճակահանության դնելու համար: Վիճակահանությունից զուրացած հասույթի կեսը՝ 551 ֆրանկ 71 սանտիմ, մասնաժողովի որոշման համաձայն հասցվում է վերոհիշյալ միության վարչությանը²⁴:

Սրանից բացի, բազմաթիվ ինդոնեզահայեր առանձին-առանձին հանդես են գալիս իրենց նվիրատվություններով, հօդուտ նույն նպատակի²⁵:

Այսպես նաև Զավայի հայերը 20 անգլիական ստերլինգի ռումարով օժանդակում են Լոնդոնում գործող Կարապետ Հակոբյանին, որը գործում էր հայկական հարցի պրոպագանդման ուղղությամբ: Ինդոնեզահայերին գրած իր նամակում Կ. Հակոբյանը հայտնում է, որ իր գործունեության համար մեծ նշանակություն ունի Բատավիայի սղղային վարչության կողմից ցույց տրվող քաջալերությունը: Ըստ արժանվույն գնահատելով ինդոնեզահայերի ազգասիրական ազնիվ հոգին, նա նշում է. «Այս առաջին անգամ է զի մի «կադմատրեալ» հայ հասարակութիւն և ազգային վարչութիւն, Հայաստանէն այնչափ հեռաւոր ի մի ծագ աշխարհի գտնուելով, նուիրէ

21 «Արմենիա», 1886, № 34.

22 «Արմենիա», 1886, № 2.

23 Հմմտ. «Հայ ժողովրդի պատմություն», մասն Բ, 1958, էջ 149.

24 «Արմենիա», 1891, № 85.

25 «Արմենիա», 1892, № 54.

իր օժանդակությամբ և դործովքս՝ Այնուհետև ավելացնում է, որ եթե ողջ աշխարհի հայությունը ինդոնեզիայի հայերի նման զիտակցեն իր պարտականությունը, այն ժամանակ ռուսաստան իր փրկությունն ու դարմանն վաղվադակի պիտի գտնէր»²⁶։

Արևմտյան Հայաստանի տարբեր վայրերում բռնկվող և հետզհետե տարածվող ազատագրական շարժումների արձագանքները հասնելով մինչև ինդոնեզիա, ավելի մեծ ոգևորություն էին ստեղծում հայերի մեջ։ Նրանք մեծ սիրով շարունակում էին նպաստել ազգային-ազատագրական պայքարի ավելի արագ ծավալմանը։ Այս շարժումներին օգնություն ցույց տալու գործը ավելի լավ կազմակերպելու և ղեկավարելու համար, Զավայի հայերը մտածում էին հիմնել մի հատուկ կազմակերպություն։ Եվ ահա այդ նպատակով Սուրաբայա քաղաքի հայ երիտասարդությունը ինդոնեզահայ նշանավոր լուսանկարիչ Հ. Քյուրբչյանի խորհրդով հիմնադրում է մի միություն՝ «Հայոց խրախուսական միաբանություն» անունով՝ 1891 թ. օգոստոսին։ Միության նախագահ է ընտրվում Մ. Տեր-Նահապետյանը, իսկ քարտուղար Հ. Հորդանանյանը։ Անդամները ընդհանուր 20 էր, իսկ հետո, երբ միության նպատակը պարզ դարձավ բոլորին, բարձրացավ 40-ի։ Այնուհետև պատրաստվեց մի կանոնադրություն՝ զբաղվելով, որը 1892 թ. տպագրվեց Մարսելում Մկրտիչ Փորթուգալյանի տպարանում։ Ըստ կանոնադրության, միաբանության գլխավոր նպատակն էր նյութական և բարոյական կարողության համեմատ նպաստել այնպիսի ազդեցություն գործելին, որոնք վերաբերում են հայրենիքի ազատագրությանը։ Այս նպատակի համար պետք է հանդեսանալու կատարվեն՝ ուղարկելու համար անհրաժեշտ վստիկներ։ Միաբանությունը պետք է ունենար ընթերցարան հայերեն և մի քանի օտար լեզվով թերթերի, հայրենիքի և ընդհանրապես հայ զաղութների մասին տեղեկություններ ունենալու համար։ Եվ բացի այդ, միությունը սերտ համագործակցության մեջ պիտի մտներ ուրիշ ազգային կազմակերպությունների հետ։ Միաբանությունն ունենալու էր իր վարչությունը, որը վերընտրվելու էր մի տարուց հետո։ Վերջինս պետք է մտածեր եկամուտներն ավելացնելու միջոցների մասին։ Միությունը կազմված էր լինելու երկու ժողովներից՝ ընդհանուր և վարչական, որոնք ընկերության գործադիր մարմինն էին։ Բացի ամսական ժողովից, վարչությունը 6 ամիսը մեկ անգամ պետք է ունենար ընդհանուր ժողով, որին հրավիրվելու էին մոտակա վայրերի անդամները։ «Հայոց խրախուսական միաբանությանը» կարելի էր անդամագրվել կամ նվիրատվությամբ անդամակցել։ Նրա անդամ կարող էր լինել յուրաքանչյուր հայ, որը կվճարեր մուտքի տուրք՝ 5 գիլդեր և ամսավճար՝ 2,5 գիլդեր։ Այնուհետև 100 գիլդեր կամ ավելի վճարող նվիրատուն արձանագրվում էր պատվո անդամ։ Ընդհանուր ժողովի հավանությամբ կարելի էր որևէ բարերարի կամ նշանավոր ազգային գործչի պատվավոր անդամ ընտրել։ Միաբանության ամբողջ եկամտի 25 տոկոսը պետք է պահպանվեր զբաղմունքի արձանագրման մեջ, որին միայն խիստ անհրաժեշտության դեպքում կարելի էր ձեռք տալ։ Միությունը չէր կարող լուծվել այնքան ժամանակ՝ որքան որ անդամների թիվը առնվազն 5 հոգի էր։ Լուծվելու դեպքում նրա ողջ ունեցվածքը և պատրաստի դրամարը պետք է հանձնվեր Բատավիայի «Հայկյան միաբանությանը»։ Վերջինս դրամի կեսը պետք է տրամադրեր այն հայրենասիրական միությունը, որի նպատակը միևնույնն է, ինչ որ խրախուսական միաբանությանը, այն է՝ օգնել Արևմտյան Հայաստանի ազատագրության ագոնիկ գործին, իսկ մյուս կեսը մնալու էր ավանդ նոր-Ջուլայի Ս. Կատարինե օրիորդաց դպրոցի անունով²⁷։

19-րդ դարի 90-ական թթ. հայ ժողովրդի նկատմամբ եղած հալածանքները և ճնշումները ավելի են ուժեղանում։ Սուլթանական կառավարության կողմից նորանոր ծրագրեր էին մշակվում ավելի մեծ մասշտաբով կոտորածներ կազմակերպելու համար։ Այս շրջանում հայ մտավորականներից ոմանք, որոնց թվում նյու-Յորքում լույս տեսնող «Հայք» ամսագրի խմբագիր Մ. Գաբրիելյանը, հակադրվելով Մ. Փորթուգալյանին և քաղաքական տարբեր հոսանքներին՝ առաջ էին քաշում հայ ժողովրդի ազատագրության համար միասնական պայքարի զաղափարը և այն միտքը, թե նախ և առաջ անհրաժեշտ է հայ ժողովրդի ազգային ինքնազիտակցությունը զարգացնել լուսավորության միջոցով և խոհեմարար նախապատրաստվել ազատագրման գործի իրականացման համար²⁸։

1891 թ. Մ. Գաբրիելյանը ձևակերպում է լինում «Կենտրոնական Հանձնախումբ» անունով

²⁶ «Արմենիա», 1886, № 77։

²⁷ Հ. Հորդանանյան, էջ 118—120։ Թ. Գուշակյան, էջ 311—314։ «Հայք» (ամսագիր), նյու-Յորք, 1892, № 12, էջ 93—94։

²⁸ Ամերիկահայու տարեցույցը, Բոստոն, 1912, էջ 130—132։

մի համազգային միության ստեղծմանը՝ հայ ժողովրդի ազգային շարժումներին օգնելու համար: Այնուհետև կազմվում է հանձնախմբի ծրագիրը, որի պատճենը քննարկման համար շրջաբերական նամակով ուղարկվում է պանպոս հայ զաղութներին, այդ թվում նաև Ինդոնեզիայի հայությանը, միաժամանակ դիմելով մասնակցելու հանձնախմբի ընտրությանը²⁹, 1892 թ. հունիսի 12-ին «Կենտրոնական Հանձնախմբի» անունով ստացվում է Ջավա կղզու Սուրաբայա քաղաքի «Հայոց խրախուսական միաբանության» նամակը, ուր նկարագրվում է, թե ինչպիսի ջերմ ընդունելության և հավանության է արժանացել վերոհիշյալ հանձնախմբի ծրագիրը, միաբանության այս առթիվ գումարված ժողովում: Նամակում մեծ պատրաստակամություն է հայտնվում ամեն ջանք գործ գնելու հայրենասիրական այս գործին օգնելու համար, թե՛ նյութապես և թե՛ բարոյապես: Կայացած ժողովում միաբանությունն ընդունում է հետևյալ որոշումները.

«1) Զի միաբանությունն նկատել գծագիր յանձնախմբիդ յոյժ գործնական և օգտակար է բարոյ լուծումն հայկական խնդրոյն, կամ որ նոյն է՝ ի ձեռս բերելոյ զազատութիւն հարստահարեալ եղբարցն մեր՝ որք ընդ անամօթ լծով բռնութեան Թուրքաց հիւծին:

2) Զի միաբանութիւնս ամենայն ջանս ի գործ դիցել զրամ հանգանակել ի նպաստ կեդրոնական միութեանն:

3) Զի միաբանութիւնս այս՝ որպէս զրաւական անկեղծ համակրանացն իւր կանխիցէ առաքել առ Զեզ 600 ֆրանք—որպէս ի ներփակեալ ցուցակիս—առ ի ունել ընդ տրամադրութեամբ կազմել ի կեդրոնական միութեանն, որոյ կազմութիւնն կարի յժրախտաբար մինչ ցարդ չէ ի գլուխ ելեալ:

Այնուհետև ինդոնեզահայերը նամակում մեծ գովասանքով են արտահայտվում համազգային միության նախաձեռնող Մ. Գաբրիելյանի մասին, որը մեծ եռանդով ձեռնամուխ է եղել մի այդպիսի ղեկավարին և պատասխանատու գործի: Հանձնախմբի նախագահ Գ. Գասպարյանը Սուրաբայայի «Հայոց խրախուսական միաբանության» նախագահ Մ. Տեր-Նահապետյանին ուղղած շնորհակալական նամակում իր խորին երախտագիտությունն է հայտնում ինդոնեզահայերի այսպիսի անձնվեր քայլի և գործնական հայրենասիրության համար, շեշտելով, թե «տարակոյս չունիմք թէ քաղում տխրեալ հոգիներ պիտի զուարթանան և շատ վարանամիտներ պիտի ցունց առնուն ի լուր ձեր այս հայկարժան նախաձեռնութեան, և կենդրոնացման մեծ խնդիրն նոր փութով առաջ պիտի մղուի դէպ ի բարի վախճան և կատարումն»³⁰։ Վերջում ավելացնում է, թե նկատի ունենալով այն հանգամանքը, որ «Կենտրոնական Հանձնախմբ»-ը դեռ չի կազմվել, ետ է վերադարձվում 600 ֆրանկը, որն առաջարկվում է հանձնել Փարիզի հայոց հայրենասիրական հանձնախմբին, որը պետք է ստանան «Կենտրոնական Հանձնախմբի» ղեկավարությունը³¹:

Կարճ ժամանակ անց՝ «Հայոց խրախուսական միաբանություն»-ը, «Հայք» ամսագրի հրատարակմանը նպաստելու համար, ամսագրի խմբագրությանն է ուղարկում 400 ֆրանկի փոխանակադիր, որի մեջ կային երեք բաժնեդեմոնստրացիայի, Բացի այդ, Ջավայի Բատավիա-քաղաքի հայերի նախաձեռնությամբ էլ հավաքվում է 40 դոլար, նույն նպատակի համար³²:

Շատ իրավացի կերպով «Հայք»-ը նշում է. «Այս թերթը մինչև այժմ կանգուն պահող ամենէն հզոր և նեցուկները մեր Փարիզի հայրենակիցները եղած են զոյգ ընդ Սուրաբայայի հայրենակցաց»³³։ Իրավամբ չի կարող հիացմունք չառաջացնել հեռավոր Ինդոնեզիայում գոյություն ունեցող հայրենասիրական միության գործունեությունը, որը բոլոր միջոցներով աշխատում էր մասնակից զանալու հայ ժողովրդի փրկության գործին նվիրված ձեռնարկումներին:

Այն ժամանակ, երբ հայ մտավորականության մտահոգության զխաղոր առարկան էր հայ ժողովրդի ծանր և հուսահատական վիճակը, որը օրըցօր գնալով ավելի էր վատթարանում, հայկական որոշ թերթերի խմբագիրներն փոխանակ հայ ժողովրդի փրկության և լքը որոնելու, իրենց անձնական շահերից ելնելով աշխատում էին դուրս գալ այնպիսի հայրենասիրական նախաձեռնության դեմ, ինչպիսին էր հայոց համազգային միության ստեղծումը: Այս բանը չէր կարող զայրույթ չառաջացնել հայության զանազան զանգվածների մեջ: Նվ ահա հեռավոր Ինդոնեզիայի Սեմարանգ քաղաքից ստացվում է մի նամակ, ուղղված Նյու-Յորքի «Հայք» ամսագրի խմբագիր Մ. Գաբրիելյանին: Բերում ենք մի հատված այդ անանուն նամակից, որի հեղինակը շատ իրավացի կերպով իր վրդովմունքն է հայտնում վերոհիշյալ երևույթի վերաբերյալ. «Այսօր—հայոցս

²⁹ «Հայք», 1891, № 2, էջ 10—12, № 10, էջ 78—79.

³⁰ «Հայք», 1892, № 16, էջ 122—123.

³¹ «Հայք», 1892, № 24, էջ 191.

³² «Հայք», 1896, № 8, էջ 126.

³³ «Հայք», 1897, № 5, էջ 80.

համար վշտալից օրս—այնինչ հարստահարեալ եղբարք մեր—դողդիւր ազգն ողջուն—ձայն բարձրացուցանելով փրկութիւն կ'աղաղակէ և այնինչ մայր Հայաստան կը հեծէ ընդ լծով բռնապետութեան անօրինաց և յորժամ դառնացեալ և ցասմամբ լի են սիրտք մեր, և աստ՝ անդ ի խնդիր եմք և դռնեմք օգնութիւն, օգնութիւն, արդարեւ զայրոյթ անհնարին ի վերայ զայ ի նկատելն լի է միջոյ մերմէ յերևան եկեալ են դաս մի խմբագրաց որք լոկ վասն անձնական շահուց և փառասիրութեան, զամենայն ճիղն իւրեանց թափեն առ ի քանդել զհիմն այն շինուածոյն որոյ սկզբնաւորութիւն լեալ է ի ճշմարիտ զաւակաց Հայկայ, յայնպիսի եռանդուն հայրենասիրաց յորոց շաւղի պարծանս զղամ տեսանել այսօր և զԶեզ անընկճելի յարատեւութեամբ... փոխանակ ձայն մարդասիրութեան բարձրացուցանելոյ, փոխանակ սիրոյ, միութեան և հայրենեաց դատին ջատագով և պաշտպան կալոյ... փոխանակ բողոք ամբառնալոյ ընդդէմ անգթութեանց և խժոժութեանցն մոլեռանդ և վայրագ Թրքաց և Քրդաց, անձնական յարձակմունս առնեն ընդդէմ Զեր և այլոց»։ Նա զայրացած հարց է տալիս, թե այսպիսի՝ եղանակով միթե պետք է սրբել այդքան դառնութիւններ և փորձութիւններ բնթարկված հայ ժողովրդի արտասուքը, «այսպիսի՝ միջոցօք վերջապէս կամիմք զկարծիս և զկարեկցութիւնս օտարաց ի մեզ ձգել»։ Բացահայտելով նրանց բռնած տարօրինակ և վնասակար դիրքը, նամակագիրը ցույց է տալիս, թե ինչպիսի աղետալի հետևանք կարող է ունենալ հայրենասիրական այսպիսի կարեւոր նախաձեռնութեան նկատմամբ նրանց դրսևորած նմանօրինակ վերաբերմունքը³⁴։

Օսմանյան պետութեան կողմից ստրկութեան և բնաջնջման դատապարտված հայ ժողովրդին օգնութեան ձեռք մեկնելու կոչ է հանդիսանում Սուրարայայից ուղարկված հետևյալ նամակը լոգիս ստորագրութեամբ՝ զրկված 1892 թ. հոկտեմբերի 4-ին։ Հեղինակը ընդգծելով ազգային միասնութեան դադափարը, վնասակար է համարում դործող կուսակցութիւնների անջատ գործունեությունը և գտնում է, որ հայրենիքի փրկութեան դործին ծառայելու համար անհրաժեշտ է կենտրոնացնել բոլոր ուժերը. «Եթէ իսկապէս միևնույն է իղձ և նպատակ մեր, քնաւ և քնաւ վայել չեն մեզ որևէ կուսակցութեան բաժնուիլ, և ոչ միայն վայել չէ, այլև չիք տարակոյս, որ մեր այժմեան դրութեան մէջ կուսակցութեանց գոյութիւն, մեծամեծ վնասներ կը պատճառեն հայրենեաց դատին, որպէս պատճառս են արդէն»։ Հեղինակը այս նամակով համազգային համերաշխութեան կոչ է անում իր ժողովրդի մտավորական և հասարակական դործիչներին, որպեսզի նրանց դժելիք իմաստուն ծրարով կարողանանք «գործնական պահանջել ազգի իրաւանդ իրադործումն այն բոլոր տէրութիւններէն որք Պելլիսայ վեհաժողովի դաշնադիրն ձեռնագրել են»։ Վերջում եզրափակում է ասելով, որ չպետք է ձգձգել այդ հրատապ հարցի լուծումը, օգնութեան հասնելու համար չպատշաճ, որ նոր կոտորած սկսվի Հայաստանում, որովհետև «այն ժամանակն այլ ևս հարկ չէ մեզ խռովիլ և փրկութեան յուսալ, վասն զի ուշ է և բոլորովին անօգուտ»։ Այսօր է մեզ համար ժամն դործելոյ, նրկաթն պետք է ձեռնմք որքան դեռ տաք է»³⁵։

1895 թ. մարտի 8-ին Բատալիայում տեղի է ունենում մի ժողով, որին մասնակցում էին նաև Սուրարայա և Սեմարանդ քաղաքներում ապրող հայերի ներկայացուցիչները։ Օրակարգի ղեկավոր հարցն էր՝ հայրենիքին օգնութիւն ցույց տալու դործը։ Ժողովում մշակվում են միջոցառումներ այս դործի կազմակերպման համար։ Այնուհետև ընթերցվում է կալկաթայում անգլերեն լեզվով լույս տեսնող «Արա» ամսագրի խմբագիր Մելիք Բեգլարի նամակը ուղղված Բատալիայի հայերին, որ նա տեղեկացնում է, թե Կալկաթայի հայերը ժողով են գումարել իրենց թշվառացած հայրենակիցներին օժանդակելու համար, ընդունելով 8 կետից բաղկացած որոշումներ։ Նամակագիրը առաջարկում է Բատալիայի հայ հասարակութեանը մի այդպիսի ժողով գումարել, քննարկել այդ որոշումները և իրենց կարծիքը հայտնել դրանց մասին։ Ժողովում կարգավում են վերոհիշյալ որոշումները, որոնց կապակցութեամբ առաջանում են տարբեր կարծիքներ այն պատճառաբանությամբ, որ ինչպես հարկն է չեն ուսումնասիրել հայկական խնդիրը, լավ տեղյակ չեն Արևմտյան Հայաստանի տեղական ու քաղաքական հանգամանքներին, որպեսզի կարողանային համարձակ առաջարկություններ անել այն համոզմամբ, որ դրանք վնաս չեն հասցնի հայ ժողովրդին։ Բայց հաշվի առնելով այն, որ Կալկաթայի ազգայինների հետ չի կարելի համադորձակցել առանց որոշումների բոլոր կետերի շուրջը համաձայնութեան զալու և համոզվելով դրանց օգտակարութեան մեջ, հավանութիւն են տալիս և ընդունում որոշումներ ի կենտրոն ամբողջությամբ³⁶։

Ինչպես հայտնի է՝ 1894 թ. սուլթանի հրամանով մասսայական կոտորած կազմակերպվեց

34 «Հայք», 1892, № 14, էջ 108—109։

35 «Հայք», 1892, № 22, էջ 173։

36 «Արմենիա», 1895, № 72։

Սասունում, որը հանդիսանում էր հայ ազգային-ազատագրական շարժման կարևորագույն կենտրոններից մեկը:

Զամայում հոլանդերեն լույս տեսնող «Սուրբայա Կուռանտ» թերթը իր 1895 թ. հունիսի 8-ի համարում հատուկ հոդված է տպագրում Սասունի կոտորածի վերաբերյալ, ուր նկարագրում է թուրքերի բարբարոսությունները հայերի նկատմամբ և առաջարկում է ստեղծել մի նպաստամատույց հանձնաժողով, աղետյալներին օգնելու համար: Այնուհետև ինդոնեզիայի հայ գաղութի ակնավոր ներկայացուցիչ Հ. Հորդանանյանը վերոհիշյալ թերթի հունիսի 29-ի համարում հանդես է գալիս «Ուր մնաց բարեգործությունն» վերնագիրը կրող հոդվածով, ուր նախ շնորհակալություն է հայտնում թերթի խմբագրին այդպիսի նախաձեռնության համար և հետո անհանգստանում է, որ հանձնախմբի կազմակերպումը ձգձգվում է: Հոդվածագիրը ավելացնում է, «Որպես որ հայտնի է Ձեր ընթերցողներին, մոլեռանդ թուրքերի և վայրագ բուրդերի անզեն հայերի վրա գործադրած սոսկալի անգթությունները տեղի ունեցան օգոստոսի վերջին շաբաթվա և սեպտեմբերի առաջին երկու շաբաթների ընթացքին... թուրքական կառավարությունը է՛լ ավելի քաջալերեց այդ շարիքը: Իշխանության դատապարտելի անհոգության մար էր անշուշտ, որ քաֆիրների-քրիստոնյա հայերի կոտորածը երեք երկար շաբաթներ շարունակվեց առանց ցեղի կամ հասակի խտրության: Եվ ինչո՞ւ, որովհետև խեղճ գյուղացին հանդգնել էր իր տղերուկներին, տևրության պաշտոնյաներին հայտարարել, թե բուրդ ավազակներից կողոպտված լինելով, իր դառն աղքատության մեջ անկարող էր երրորդ անգամ պահանջված հարկը վճարել: Հոդվածի վերջում, նա դիմում է ինդոնեզիայի բնակչությանը և հայերին, օգնության ձեռք մեկնելու կոտորածից տուժածներին, հիշելով, որ Բատավիայում արդեն հանձնախումբ է կազմվել նույն նպատակի համար և հավաքվել է 2500 գիլդեր: Հաջորդ օրը Սուրբայայում հայերը գումարում են մի ժողով, ուր ընտրվում է երեք հոգուց բաղկացած մասնախումբ, որի ջանքերով նախապես հավաքված գումարը կրկնապատկվում է: Որոշ ժամանակ անց, զանազան նշանավոր անձնավորությունների նախաձեռնությամբ ստեղծվում է 22 հոգուց բաղկացած հանձնախումբ, որի նախագահ է ընտրվում Պ. Հովակիմյանը, իսկ պատվավոր նախագահ՝ հոլանդական նահանգապետը: Մի ընդարձակ շրջաբերական է պատրաստվում հանձնախմբի կողմից և ուղարկվում է թերթերին, բացի այդ երկու հայ կանայք մի ամբողջ շաբաթ կառքով շրջում են զանազան բնակավայրերում հանգանակություն կատարելու: Այս բոլորի արդյունքը լինում է այն, որ ընդհանուր հանգանակված գումարը դառնում է 8000 գիլդեր: Հանձնախմբի որոշման համաձայն գումարը փոխանցվում է Կ. Պոլիս հոլանդական դեսպանին և բաժանվում է Սասունի աղետյալներին³⁷:

Այսպիսով, ինչպես տեսնում ենք, օսմանյան բռնակալ յիբրայետության լծի տակ գտնվող ու դարեր շարունակ կեղեքվող հայ աշխատավոր զանգվածների ծանր վիճակը և դրա հետևանք հանդիսացող ազատագրական շարժումները լայն արձագանք էին գտնում ինչպես ողջ աշխարհում ցրված հայ ժողովրդի լավագույն զավակների, այնպես էլ ինդոնեզիայի հայ գաղութի մեջ: Նրանք ուշի ուշով հետևում էին Արևմտյան Հայաստանում տեղի ունեցող այդ շարժումներին, ամեն ջանք գործադրելով թե՛ նյութական և թե՛ բարոյական իրենց ազատատենչ եղբայրներին օգնության հասնելու համար:

Այս առումով բնորոշ են հայ մեծ լուսավորիչ-ուսույցիչներ Միքայել Նալբանդյանի խոսքերը. «Պաշտպանել այն հայի առատաթուր կոխված իրավունք է մեր կյանքի բուն խորհուրդը և նպատակը: Եվ այս նպատակին հասնելու համար չէ պիտո ընկրկինք ոչ բանտի, ոչ արքայի առջև, ոչ միայն բանի և զրշով, այլև զենքով ու արյունով: Ահավասիկ մեր դամանությունը, որի մեջ տեսնում ենք ազգի փրկությունը³⁸: Իրավամբ, Նալբանդյանը առաջ քաշելով այս «դավանությունը», նրա մեջ էր տեսնում «ազգի փրկությունը»: Այս «դավանությամբ» էին առաջնորդվում և զաղթավայրերի հայերը: Մինչև անգամ, օվկիանոսներով ու ծովերով բաժանված հեռավոր ինդոնեզիայի հայ գաղութի անդամները, այլ գաղութների հետ միասին, օգնության ձեռք էին մեկնում ազատագրության դրոշ բարձրացրած իրենց եղբայրներին:

37 Հ. Հորդանանյան, էջ 121—124, «Հայք», 1895, № 8, էջ 118, «Հայք», 1896, № 2, էջ 24—25:

38 Միքայել Նալբանդյան, Երկու տող և ազգային թշվառություն, Երևան, 1939, էջ 24—25: